

**Dewan Rakyat Kutuk Filem Anti-Islam
Mstar Online
25 September, 2012
Oleh ARIFFUDDIN ISHAK**

KUALA LUMPUR: Dewan Rakyat pada Selasa sebulat suara mengutuk penyiaran filem anti-Islam *Innocence of Muslim* yang menghina Nabi Muhammad SAW.

Ahli Parlimen Barisan Nasional (BN) dan pembangkang ketika membahaskan usul tergepar tersebut mengecam sekeras-kerasnya penghasilan filem yang disifatkan mempunyai agenda untuk mengundang kemarahan umat Islam di seluruh dunia.

Menteri di Jabatan Perdana Menteri, Datuk Seri Mohamed Nazri Abdul Aziz ketika mengulung perbahasan usul tergepar tersebut menegaskan Malaysia tidak akan membenarkan berlakunya penghinaan terhadap mana-mana agama.

"Malaysia mengutuk sekeras-kerasnya video anti-islam yang menjadi punca protes anti-Amerika di beberapa buah negara Islam seluruh dunia.

"Video anti-Islam yang dihasilkan atas dasar kebebasan mutlak bersuara di negara-negara Barat termasuklah di Amerika Syarikat telah mencetuskan penentangan dan kemarahan masyarakat islam diseluruh dunia. Justeru Malaysia berpendirian bahawa kebebasan bersuara perlu dilaksanakan secara berhemah dan penuh tanggungjawab," katanya.

Selain itu Mohamed Nazri berkata bersandarkan kebebasan tanpa batasan yang diamalkan Barat, penghasilan video anti-Islam berkenaan akhirnya memburukkan lagi polemik antara Barat dengan negara-negara Islam.

Tambah beliau Artikel 10 Perlembagaan Malaysia turut memperuntukkan hak kebebasan bersuara namun menegaskan hak berkenaan bukan sesuatu yang mutlak.

"Ia bukanlah satu hak yang mutlak dan kebebasan menghina atau menfitnah tidak harus dibenarkan sehingga boleh menjejaskan kehidupan serta keharmonian masyarakat antarabangsa.

"Malaysia juga berpendirian bahawa pandangan serta tindakan ekstrim atau melampau dan keganasan yang dilakukan oleh beberapa pihak tidak boleh diterima sama sekali," katanya.

Dewan Rakyat membahaskan usul mengutuk penyiaran filem pendek berkenaan selama satu jam selepas menerima usul tergepar Khairy Jamaluddin (BN-Rembau) dan Salahuddin Ayub (PAS-Kubang Kerian).

Filem arahan Sam Bacille dari California yang disiarkan dalam laman YouTube itu mencetuskan kemarahan umat Islam di seluruh dunia apabila menggambarkan Nabi Muhammad sebagai seorang yang homoseksual, menyokong seks luar nikah dan pedofilia.

Source:

http://mstar.com.my/berita/cerita.asp?file=/2012/9/25/mstar_berita/20120925183151&sec=mstar_berita